



**TOSHKENT DAVLAT YURIDIK UNIVERSITETI REKTORINING
B U Y R U G ' I**

17.02.2022 yil

36 um-son

**Toshkent davlat yuridik universitetida ma'naviy-ma'rifiy
ishlarni tizimlashtirish hamda talabalarning iqtidor va
iste'dodlarini aniqlashni yangi bosqichga olib chiqish
to'g'risida**

O'zbekiston Respublikasi Prezidentining 2021-yil 26-martdagi "Ma'naviy-ma'rifiy ishlar tizimini tubdan takomillashtirish chora-tadbirlari to'g'risida"gi PQ-5040-son, 2022-yil 19-yanvardagi "Mahallalarda yoshlar bilan ishlash tizimini tubdan takomillashtirish chora-tadbirlari to'g'risida"gi PQ-92-son hamda 2022-yil 20-yanvardagi "Zakovat" intellektual o'yinini aholi o'rtasida ommaviy-ma'rifiy harakatga aylantirish va boshqa intellektual o'yinlarni rivojlantirishga oid chora-tadbirlar to'g'risida"gi PQ-96-son qarorlarida belgilangan vazifalar ijrosini ta'minlash hamda zamon talablari va xalqaro standartlarga javob beradigan loyihalarni amalga oshirish, ta'lim va tarbiya uyg'unligini ta'minlashning turli samarali usul va vositalaridan foydalangan holda yoshlar tarbiyasi va ma'naviy-ma'rifiy ishlarni tizimlashtirish maqsadida

B U Y U R A M A N:

1. O'zbekiston Respublikasi Prezidentining 2022-yil 19-yanvardagi PQ-92-son hamda 2022-yil 20-yanvardagi PQ-96-son qarorlari ma'lumot va ijro uchun qabul qilinsin.
2. Yuqoridagi qarorlar bilan quyidagilar tasdiqlanganligi

inobatga olinsin:

har bir shaharcha, qishloq, ovulda, shuningdek, shaharlar, shaharchalar, qishloqlar hamda ovullardagi har bir mahallada yoshlar yetakchisi (keyingi o'rinlarda - Yoshlar yetakchisi) lavozimi joriy etilganligi hamda uning asosiy vazifalari belgilanganligi;

“Zakovat” intellektual o'yinini aholi o'rtasida ommaviy-ma'rifiy harakatga aylantirish va boshqa intellektual o'yinlarni rivojlantirish bo'yicha chora-tadbirlar dasturi hamda respublika tashkiliy qo'mitasi tasdiqlanganligi;

intellektual o'yinlarni nafaqat yoshlar, balki aholining barcha qatlamlari o'rtasida targ'ib qilish, ushbu o'yinlarni ommaviy-ma'rifiy harakatga aylantirish bo'yicha chora-tadbirlarni belgilash va amalga oshirishni ta'minlash, shuningdek, milliy intellektual o'yinlarni shakllantirish, ularni ommalashtirish bo'yicha tegishli chora-tadbirlarni amalga oshirish Tashkiliy qo'mitaning asosiy vazifalari etib belgilanganligi;

intellektual o'yinlar umumiy o'rta ta'lim maktablari, Prezident ta'lim muassasalari, o'rta maxsus va professional ta'lim muassasalari hamda oliy ta'lim muassasalari, shuningdek, ko'ngilli jamoalar o'rtasida tizimli ravishda o'tkazib borilishi;

Tashkiliy qo'mita tavsiyasiga ko'ra intellektual o'yinlarning respublika bosqichida g'olib va sovrindor (1-3-o'rinlar) bo'lgan umumiy o'rta ta'lim maktablari, shu jumladan Prezident ta'lim muassasalari o'quvchilari belgilangan tartibda-o'rta maxsus va professional ta'lim muassasalari hamda oliy ta'lim muassasalariga, o'rta maxsus va professional ta'lim muassasalari o'quvchilari-oliy ta'lim muassasalarining tegishli ta'lim yo'nalishlariga, oliy ta'lim muassasalari talabalari-ta'limning keyingi bosqichiga bazaviy to'lov kontrakt asosida imtihon sinovlarisiz qabul qilinishi;

2022/2023-o'quv yilidan boshlab intellektual o'yinlarning respublika bosqichida g'olib bo'lgan o'quvchi yoshlar va talabalar uchun yil davomida har oyda beriladigan “Zakovat” stipendiyasi

ta'sis etilishi;

ta'lim muassasalarida tashkil etilgan "Zakovat" intellektual klublarining koordinatori bo'lgan professor-o'qituvchilarga direktor jamg'armasi hamda oliy ta'lim muassasalarining budjetdan tashqari jamg'armalari hisobidan bir oylik mehnatga haq to'lash fondining 50 foizi miqdorida bir martalik ustama to'lab berilishi;

2022-yildan boshlab, bosqichma-bosqich umumiy o'rta ta'lim maktablari, Prezident ta'lim muassasalari, o'rta maxsus va professional hamda oliy ta'lim muassasalarida "Zakovat" intellektual klublari faoliyatini yo'lga qo'yilishi hamda hududlardagi Yoshlar markazlarida intellektual o'yinlar jamoalari uchun alohida xonalarni tashkil etilishi;

2022-yildan boshlab har yili Intellektual olimpiada tashkil qilib borilishi hamda Intellektual olimpiada ta'lim yo'nalishi, sohasi, mutaxassisligidan qat'i nazar respublikadagi barcha oliy ta'lim muassasalari talabalari o'rtasida o'tkazilishi;

Intellektual olimpiada xalqaro tajribani inobatga olib, milliy qadriyatlarimizga mos keladigan intellektual o'yinlar bo'yicha tashkil qilinishi;

umumjamoa hisobida birinchi, ikkinchi va uchinchi o'rinni qo'lga kiritgan oliy ta'lim muassasasiga O'zbekiston Respublikasi Prezidenti sovg'asi topshirilishi;

Davlat xizmatini rivojlantirish agentligi Intellektual olimpiada g'olib va sovrindorlarini o'z mutaxassisligi bo'yicha kadrlar zaxirasiga olish amaliyotini yo'lga qo'yishi;

2022/2023-o'quv yilidan boshlab har yili aprel oyida "Intellektual haftalik" tadbirini tizimli ravishda o'tkazib borilishi hamda "Intellektual haftalik" oliy ta'lim muassasalarining talabalari o'rtasida intellektual sog'lom raqobatni yuzaga keltirish, talaba-yoshlarning bilimga bo'lgan intilishlarini qo'llab-quvvatlash va rag'batlantirish, respublikaning turli hududlarida tahsil olayotgan zakovatli yoshlar uchun fikr almashish imkoniyatini yaratish, oliy ta'lim muassasalarida intellektual to'garaklar faoliyatini rivojlantirish hamda yoshlar orasida

kitobxonlikni targ'ib qilish maqsadida tashkil qilinishi.

3. Universitetda talabalarni vatanparvarlik ruhida tarbiyalash, ularning intellektual salohiyatlarini yuksaltirish, nazariy bilimlarini amaliyot bilan yanada mustahkamlash, sog'lom fikrlash, bahsga kirishish va notiqlik mahoratini oshirish borasidagi ishlarni amalga oshirish har bir xodimning ustuvor vazifasi etib belgilansin.

4. Prorektorlar I.Rustambekov hamda A.Xashimhonov bir oy muddatda tegishli mutaxassislarni jalb qilgan holda universitet talabalari uchun joriy etilgan "Jamiyatga xizmat qilish moduli"ni yanada takomillashtirib, uni talabalarning harakat dasturiga aylantirish choralari ko'rsin.

Bunda har bir talabaning fuqarolar bilan ishlashi, ularning dardu-hol va muammolarini eshitishlari va huquqiy yordam berishlari, ularning huquqiy ongi va madaniyatini oshirishlari, jamiyat hayotidagi eng muhim voqea va hodisalarni bilishlari va ularga nisbatan o'z fikrini, faol fuqarolik pozitsiyasini ko'rsata olishi, vatanparvarlik ruhidagi loyihalarda ishtirok etishi (boshqa tanlov va loyihalar bilan bir qatorda), O'zbekiston Respublikasini va universitetni yanada rivojlantirish borasida o'z takliflarini tizimli ravishda berib borishi va amaliy harakatlarni amalga oshirishini qamrab olinishiga e'tibor qaratsin.

5. Yoshlar masalalari va ma'naviy-ma'rifiy ishlar bo'yicha prorektor A.Xashimhonov:

universitet rektorining 2021-yil 12-maydagi 08-127-son buyrug'iga muvofiq universitetga biriktirilgan Yunusobod tumanidagi 9 ta mahalla fuqarolar yig'inlarida uyushmagan yoshlar bilan ishlash tizimini yanada takomillashtirsin;

ushbu mahallalarda yoshlar yetakchisi bilan hamkorlikni kuchaytirish hamda unga O'zbekiston Respublikasi Prezidentining 2022-yil 19-yanvardagi PQ-92-son qarorida belgilangan vazifalar ijrosi ta'minlashga ko'maklashish choralari ko'rsin.

6. Buyruq bilan:

Yunusobod tumanida joylashgan universitetga biriktirilgan

mahallalarda yoshlarning bo'sh vaqtlarini 2022-yilda mazmunli tashkil etish borasida amalga oshiriladigan qo'shimcha chora-tadbirlar rejasi 1-ilovaga;

talabalarning nazariy bilimlarini amaliyot bilan yanada mustahkamlash, ularni tanlagan kasblariga bo'lgan qiziqishlarini oshirishga qaratilgan TSUL COURT namunaviy sud protsessi tanlovini o'tkazish tartibi to'g'risidagi nizom 2-ilovaga,

talabalarda sog'lom fikrlash, bahsga kirishish va notiqlik mahoratini oshirishga qaratilgan Munozara turnirini o'tkazish tartibi to'g'risidagi nizom 3-ilovaga,

universitet talabalari o'rtasida Balli huquqshunoslar ko'rik-tanlovini o'tkazish tartibi to'g'risidagi nizom 4-ilovaga,

2021/2022-o'quv yilining 2-semestrida jismoniy tarbiya va sport yo'nalishida amalga oshiriladigan tadbirlar reja-grafigi 5-ilovaga muvofiq tasdiqlansin.

7. Universitetda talabalarning intellektual salohiyatini oshirish, ularning notiqlik mahoratlarini oshirishga qaratilgan loyihalarni o'quv yili va bir semestrga mo'ljallangan davomli va har bir guruhni qamrab olishga qaratilgan loyiha va tanlovlarni amalga oshirishga alohida e'tibor qaratilsin.

8. Ma'naviyat va ma'rifat markazi (Sh.Po'lotov) va fakultet dekanlari:

mazkur buyruq bilan tasdiqlangan ilovalarda belgilangan tanlov va tadbirlarni yuqori saviyada tashkil etish;

tanlov va tadbirlar to'g'risidagi ma'lumotlarni talabalar orasida keng targ'ib qilib ularning munosib ishtirokini ta'minlash;

tanlov va tadbirlarning barcha bosqichlarini OAVlari orqali keng yoritish;

tanlov va loyihalarda ishtirok etib g'oliblikni qo'lga kiritgan talabalarni munosib rag'batlantirish;

universitetda yoshlar tarbiyasi va ma'naviy-ma'rifiy ishlarni tizimlashtirish, ularda talabalarning keng qamrovini amalga oshirish maqsadida tanlov va loyihalar haqidagi ma'lumotlarni elektron tarzda olish va ro'yxatdan o'tish imkoniyatini yaratish

choralarini ko'rsin;

universitet rektorining 2021-yil 1-iyundagi 08-143-son buyrug'i bilan tasdiqlangan "Toshkent davlat yuridik universitetida ma'naviy-ma'rifiy tadbirlarni o'tkazish bo'yicha kalendar reja"da belgilangan chora-tadbirlarni ham o'z vaqtida va sifatli bajarilishini ta'minlasin.

9. Universitetda "Zakovat" intellektual klubi tashkil etilsin hamda mazkur klubni xodim va talabalar ommaviy-ma'rifiy harakatiga aylantirish belgilab o'tilsin.

Bu borada quyidagilar amalga oshiriladi:

"Zakovat" intellektual klubi doirasidagi intellektual o'yinlar dastavval universitetning "Yoshlik" oshxonasida (tadbirkor faoliyatiga xalaqit bermagan holda) o'tkazib boriladi, keyinchalik universitet uchun qurilayotgan kampusda intellektual o'yinlar uchun maydon ajratiladi;

2022/2023-o'quv yilidan boshlab universitet talabalari universitet qoshidagi akademik litsey o'quvchilari uchun "Zakovat" stipendiyasi ta'sis etiladi.

Bunda intellektual o'yinning bir o'quv yili davomidagi turnirida eng yuqori ball to'plagan jamoa a'zolarining barchasi stipendiya sohibi bo'ladi;

"Zakovat" intellektual klubining koordinatori bo'lgan professor-o'qituvchilarga budjetdan tashqari jamg'arma mablag'lari hisobidan bir oylik mehnatga haq to'lash fondining 50 foizi miqdorida bir martalik ustama to'lab beriladi.

10. Yoshlar masalalari va ma'naviy-ma'rifiy ishlar bo'yicha prorektor A.Xashimhonov:

2 oy muddatda "Zakovat" intellektual klubi faoliyatini tashkil etish choralarini ko'rsin;

3 oy muddatda mavjud tajribalarni tahlil qilgan holda universitet talabalari va universitet qoshidagi akademik litsey o'quvchilari uchun "Zakovat" stipendiyasini ta'sis etish tartibini tayyorlasin va tasdiqlash uchun taqdim etsin.

Bunda stipendiya miqdorini stipendiantga bazaviy stipendiyaning bir barobari miqdorida 10 oy davomida to'lab

borilishi bo'yicha tartib kiritsin;

"Zakovat" intellektual klubiga universitet professor-o'qituvchilari orasidan munosib koordinator shakllantirish choralarini ko'rsin.

11. Universitetda sog'lom turmush tarzini keng targ'ib qilish maqsadida quyidagicha tartib joriy etilsin:

xodimlar uchun har shanba kuni sport kuni sifatida belgilanib, ular o'rtasida turli sport musobaqalari, tanlovlari o'tkazilib kelinadi;

har kuni xodimlar uchun qulay vaqtlarni tanlab hamma uchun umumiy "Sport daqiqasi" jismoniy mashqlari joriy qilinadi.

12. Kadrlar bo'limi (Sh.Hamroqulov), Ma'naviyat va ma'rifat markazi (Sh.Po'lotov) hamda Jismoniy tarbiya va sport kafedrası (D.Dokuchayev):

tarkibiy bo'linma rahbarlari, professor-o'qituvchilar va xodimlarni sport bilan shug'ullanishi uchun yetarli shart-sharoit yaratish choralarini ko'rsin;

universitet kasaba uyushmasi (M.O'razaliyev) bilan kelishgan holda har kuni xodimlar uchun qulay vaqtlarni tanlab hamma uchun umumiy "Sport daqiqasi" jismoniy mashqlarini joriy qilish choralarini ko'rsin hamda barcha xodimlar o'rtasida tushuntirish ishlarini olib borsin;

"Sport daqiqasi" jismoniy mashqlari bo'yicha qo'llanmalar tayyorlab ularni har bir xodimga taqdim etish choralarini ko'rsin;

ish vaqtidan so'ng barcha o'qituvchi va xodimlarni haftada bir marotaba sportning tegishli turlari bilan shug'ullanishini ta'minlasin;

sog'lom turmush tarzini keng targ'ib qilish bo'yicha xodim va talabalar o'rtasida muntazam ravishda sport tadbirlari, musobaqa va loyihalar o'tkazib borish choralarini ko'rsin;

sport bilan faol shug'ullanib kelayotgan hamda sog'lom turmush tarzini keng targ'ib qilishda faollik ko'rsatib kelayotgan xodim va talabalarni rag'batlantirish bo'yicha takliflar kiritib borsin;

sport bilan shug'ullanishning ahamiyati bo'yicha universitet

jamoasining OAVlari orqali chiqishlarini ta'minlasin;

xodimlarga sport mashg'ulotlariga oilaviy va jamoaviy ishtirok etishni keng targ'ib qilsin.

13. Barcha xodimlarga tushlik va kechki ovqatdan so'ng piyoda yurish tavsiya etilsin.

14. Jismoniy tarbiya va sport kafedrası (D.Dokuchayev):

professor-o'qituvchilar va xodimlar sport bilan shug'ullanish uchun yetarli shart-sharoit yaratish maqsadida universitet sport zalidan foydalanish reja-grafigini tasdiqlasin;

fakultet dekanlari bilan kelishgan holda barcha akademik guruhlarğa kirib, sport bilan shug'ullanishni keng targ'ib qilish choralarini ko'rsin;

sport to'garaklari faoliyat samaradorligini oshirish va keng targ'ib qilish orqali ularda talabalarning qamrovini oshirish, sport bilan bir kunda 100-150 nafar talabalarni shug'ullanishlarini tashkil etish choralarini ko'rsin;

ushbu buyruqning 11-bandida belgilangan vazifalarni o'z vaqtida va sifatli amalga oshirish choralarini ko'rsin.

15. Moliya-iqtisod masalalari bo'yicha prorektor A.Iminov buyruqda ko'rsatib o'tilgan vazifalarni amalga oshirish bilan bog'liq sarf-xarajatlarni universitetning budjetdan tashqari mablag'lari hisobidan o'rnatilgan tartibda qoplash choralarini ko'rsin.

16. Mazkur buyruq ijrosini nazorat qilishni o'z zimmamda qoldiraman.

Rektor



A.TASHKULOV

Toshkent shahar

Kiritildi:

Direktor

SH.PO'LOTOV



Kelishildi:

yuriskonsult

D.ALIBOYEV



Devonxona mudiri

X.ABDULLAYEV



YOshlar masalalari va ma'naviy-
ma'rifiy ishlar bo'yicha prorektor

A.XASHIMHONOV



Moliya-iqtisod ishlar bo'yicha
prorektor

A.IMINOV



Buyruq bilan tanishdim:

SH.PO'LOTOV

